

**OD SVEG SRCA PRENOSIM DIVAN CLANAK
GOVOR REIS-ULEME**

**Molim vas procitajte do kraja. Sadržaj Upamtite i prenesite ga svima znanim i neznanim ljudima Muslimanima, a pogotovo je dobro upoznati i Ne-Muslimane Za ovo javlja je nemam boljeg, ljepseg, hairnijeg govora od ovoga koji nam uputi nas ISKRENI EFENDIJA I NAS UVAZENI, CIJELIM DUNJALUKOM POZNATIM, REISOM CERICEM.
SA ZADOVOLJSTVOM PRENOSIM NJEGOVO GOVOR I MOLIM ALLAH DA GA POZIVI DUGO DUGO NA SRECU SVIH BOSNJAKA.**

**Cjelokupni clanak prenosim sa stranice Bosnjaci.net od 30.5.2012
Hajji Safet Avdich**

P R O C I T A J !!

**Dr. Mustafa ef. CERIĆ, reisu-l-ulema Islamske zajednice u Bosni i Hercegovini
BOŠNJACIMA SE SPREMA NOVI GENOCID**

Autor: Anadolija

Objavljeno: 29. May 2012.
15:05:43

Dr. Mustafa ef. Cerić, reisu-l-ulema Islamske zajednice u Bosni i Hercegovini, upozorio je, u ekskluzivnom intervjuu za agenciju Anadolija, da nije isključeno da se Bošnjacima ponovo sprema genocid.

U prvom intervjuu za medije uopće nakon posljednjeg Sabora IZ-a BiH na kojem su raspisani izbori za novog reisu-l-ulemu, tačno 19 godina od kada je u maju ratne 1993. godine postao duhovni lider Bošnjaka, reis Cerić upozorava kako je zbog mogućih opasnosti neophodno uspostaviti jedinstvo Bošnjaka.



Dr. Mustafa ef. Cerić, reisu-l-ulema Islamske zajednice u Bosni i Hercegovini

"Nije isključeno da nam se sprema ponovni progon. Nije isključeno da neko, negdje, mimo našeg znanja, priprema da nas ponovo istrijebi sa Balkana, odnosno iz Bosne. Dakle, da nas zadesi ono što se dogodilo muslimanima i Jevrejima u Španiji", govori reis Cerić za agenciju Anadolija.

Manifestacija četništva

Ovaj alim, koji je u svijetu slovi za velikog intelektuaca, alarmantna upozorenja iznosi, između ostalog, i zbog neskrivenih mafinestacija četništva, odnosno Ravnogorskog četničkog pokreta (RČP). Pristalice ovog pokreta su u crnim uniformama i s kokardama na glavama, i proteklog vikenda (kao i mnogo puta do sada diljem BiH) protestirali povodom godišnjice hapšenja zločinca Ratka Mladića.

"Manifestacije poput marširanja "ravnogoraca" i glorificiranje ratnih zločinaca, što se tumači kao njihovo pravo na govor (!?), jesu malo od onog što mi vidimo da se, zaista, dešava. A koliko toga ne vidimo? Nedavno sam bio posjeti Muzeju holokausta u New Yorku. Direktor tog muzeja mi je kazao da su Jevreji prije 1938. godine, dakle, nakon pojave Hitlera raspravljali o svemu, postojale su različite vjerske i teološke struje među njima, no, kako mi je rekao, jedino nisu ukalkulirali mogućnost holokausta! To im nije padalo na pamet. Slično tome, i mi Bošnjaci smo 1992. godine o svemu mogli raspravljati i razmišljati, ali nismo mogli zamisliti, predvidjeti, da će nam se dogoditi genocid. Poučeni tim iskustvom, mi danas nemamo pravo ignorirati tu mogućnost da nam se ponovo dogodi genocid", pojašnjava Cerić svoj stav.

Bošnjaci ne smiju rizikovati da imaju nesposobno rukovodstvo

Zbog "činjenice koja lebdi nad našim glavama", Bošnjaci, prema Ceriću, ne smiju rizikovati da imaju nesposobno rukovodstvo, neodgovorne i sebične predstavnike. Iznova upozorava da živimo u nepredvidivom svijetu gdje istina nije ono što je, zaista, istina, već ono što kažu moćnici. U takvom svijetu ne vlada pravo, već sila i moć, pa se svaša može dogoditi. Upravo zbog toga ni položaj Bošnjaka se nije promijenio od 1992. godine. Islamofobija konstantno raste, a muslimani su uvijek "neka neželjena grupa".

"Mi smo narod koji ne smije imati slabo, nesposobno i neodgovorno rukovodstvo, jer to vodstvo treba da nas vodi i odbrani od mogućeg genocida. Ja, ponavljam, ne isključujem mogućnost pokušaja da nas se istrijebi. Ne smijemo imati zastupnike koji nisu spremni žrtvovati svoje vrijeme, zdravlje, imetak, pa i svoj život, da bi smo se sačuvali. Jer sve dotle dok ne budemo imali takve zastupnike, koji će stalno bdjeti nad našom sudbinom, odnosno imati mnogo znanja, sposobnosti i mnogo dosjetljivosti da nas informiraju, obuču, educiraju, organiziraju, da nas ujedine - nama će uvijek prijetiti mogući genocid. Svaki truli kompromis koji nas ne snaži u odbrani protiv te opasnosti, za nas je vrlo opasan. Oni koji su u poziciji da se brinu za nas, ljudi koji su javno preuzeli tu obavezu, moraju biti svjesni svoje povijesne odgovornosti za sudbinu nas Bošnjaka kao naroda", upozorio je reis Cerić.

Oduzimanju prava preživjelim žrtvama genocida da glasaju na općinskim izborima u Srebrenici

Komentirajući sve veće probleme u pozicioniraju Bošnjaka u Srebrenici, Mostaru, Brčkom, duhovni poglavar Bošnjaka ističe da je iznenađen činjenicom da "svjetovni i civilni sektor kod Bošnjaka uopće ne funkcoira".

"Zašto se tako ponašaju ljudi koji su odgovorni? Ponašaju se jer ne vide da ih iko primjećuje i poziva na bilo kakvu odgovornost. Oni mogu da rade šta hoće, kako hoće, (Četresmogu da ne rade ništa i da to, opet, prolazi. Bosna je tako napravljena da izbori nemaju nikakve sankcije u odnosu na one koji u međuvremenu ne urade svoj posao, a dali su javno obećanje da će nešto uraditi. Neophodno je da se probudimo, da zaustavimo ovaj proces topljenja bošnjačkog prisustva, utjecaja ili, ako hoćete, sigurnosti BiH, a koji nas, nažalost, sve više pogađa. Moramo zaustaviti te procese da ne idu dalje", tvrdi on.

Nadalje, govoreći o Srebrenici i oduzimanju prava preživjelim žrtvama genocida da glasaju na općinskim izborima u tom gradu, reis Cerić je kazao da je na snazi odluka Vijeća sigurnosti Ujedinjenih naroda (UN) prema kojoj taj dio BiH još uvijek "zaštićena zona".

"Niko tu odluku nije ukinuo. Tamo bi trebali biti zaštićeni svi, a posebice žrtve genocida. Nažalost, Srebrenica, kao što nije odbranjena od genocida 1995. godine, tako se ni danas ne može odbraniti od kontinuiranog genocida koji se provodi drugačijim metodama i u mirovnim uvjetima. Srebrenica je crna tačka UN-a, crna tačka na obrazu međunarodne zajednice. Moralno je neodrživo, a politički nefunkcionalno da Srebrenica kao mjesto genocida bude u sastavu onih koji su odgovorni za taj genocid. To bi bilo isto kao da muzejom u bivšem koncentracionom logoru Aušvicupravljaju nacisti i da vas oni danas tamo dočekuju. Ali, slično se dešava u Srebrenici kada nas na godišnjicu genocida dočekuju formacije MUP-a Republike Srpske, koje su, po presudama Haškog tribunala, učestvovala u genocidu. To su paradoksi koji zdrav razum može dogoditi", govori Cerić.

Posljednji evropski narod koji je trebao biti izbrisan s lica zemlje

Bošnjaci su, nastavio je, konstantno pred pitanjem da li će na čelu Srebrenice biti onaj koji negira genocid i koji bi ga sutra ponovio. Posljednji evropski narod koji je trebao biti izbrisan s lica zemlje došao je u poziciju da se u "Bosni nemaju pravo ni rahat patiti".

"Srebrenicu treba izdovoljiti iz takvog okruženja i učiniti je za cijelu Evropu mjestom poštovanja žrtava, svetim, sakralnim mjestom, mjestom gdje će doći svako ko stigne na tlo Evrope, a kako bi vidio šta se dešavalo u jednoj zemlji na kraju 20. stoljeća. Pitanje Srebrenice nije samo pitanje Srebreničana već svih nas. Ne smije se dozvoliti logika da se genocid isplati i da on čak može biti nagrađen", napominje Cerić.

Za pat poziciju u kojoj se danas nalaze Bošnjaci u Srebrenici reis Cerić optužuje upravo bošnjačke predstavnike. Prije svega one u Srebrenici. Ne dozvoljava logiku po kojoj je kriva isključivo međunarodna zajednica.

Bošnjački predstavnici nisu ništa uradili za ove tri godine, a morali su

"Bošnjački predstavnici nisu ništa uradili za ove tri godine, a morali su. Znali su šta moraju to uraditi. I ja s ovog mjesta moram izraziti poštovanje prema Vladi Sjedinjenih

Američkih Država (SAD), Ambasadi SAD-a u Sarajevu i ambasadoru Patrick Moonu. Moram izraziti zaprepaštenje da su Bošnjaci-muškarci ostavili Srebrenicu ženama da se one bore za njena prava i da slušamo nešto što nije u našoj kulturi, to jeste da podcjenjujemo nečiju pomoć, kao što je pomoć Vlade SAD-a. Moramo uvijek naći načina da se zahvalimo Americi za ono što čini, uključujući i procese u Hagu i za pronalazak ratnih zločinaca", ogorčen je Cerić.

Cerić se u intervjuu osvrnuo i na aktuelnu politiku Republike Turske prema Bosni i Hercegovini i na Balkanu uopće. Želi da Turska nastavi "trend progresa i političkog utjecaja, ne samo na Balkanu već i u svijetu, a posebno na Bliskom istoku".

"Drago mi je da je turska firma nedavno dobila koncesije da gradi dio autoputa u BiH. To je jako dobar znak da će prisustvo Turska ovdje biti vrlo zapaženo. Turska je članica Vijeća za implementaciju mira (PIC), što je važno. Znamo da Turska jeste za integraciju BiH i jedinstveno BiH. Za zemlju gdje svi građani mogu biti jednakopravni. Turska može biti ponosna na svoj odnos prema BiH i prema svim državama na Balkanu. Turskoj želimo uspjeh i napredak. No, nadamo se da će ekonomsko prisustvo Turske ovdje biti snažnije, da će dobre političke pretpostavke biti iskorištene za naše bolje ekonomske odnose. Koliko znam, tu stvari nisu najbolje, to jeste kakve bi mogli biti. Bosni trebaju radna mjesta, da se mladi zapošljavaju", istakao je Cerić i još jednom pozdravio dolazak agencije Anadoluja u BiH putem kojeg će se razmjenjivati informacije između dvije zemlje.

Nastavit ću raditi za islam, za svoj narod i za svoju Bosnu, i svoju Hercegovinu

Na pitanje šta će raditi nakon što se 19. novembra ove godine završi njegov mandat na čelu IZ-a BiH, te da li postoji mogućnost da na mjestu generalnog sekretara Organizacije islamske konferencije (OIC) naslijedi Ekmeleddina Ihsanoglua, o čemu se sve više govori u posljednje vrijeme, reis Cerić nije želio precizno odgovoriti. Takvu mogućnost nije potvorio, ali nije ju ni odbacio.

"Ja ću i dalje nastaviti raditi za islam. Za svoj narod i za svoju Bosnu, i svoju Hercegovinu. Oni koji su mislili da je završetka mog drugog mandata kraj, želim ih izvjesiti da je ovo tek početak mog rada na ove tri vrijednosti za koje ja živim. To su islam, bošnjački narod i moja Bosna, moja domovina".

Najvećim uspjehom u dugogodišnjem vođenju IZBiH smatra činjenicu da je "sačuvano jedinstvo dina i umeta".

"Danas imamo respektabilnu i vrlo dobro organiziranu Zajednicu, koju smo uspjeli uvesti u tokove društvenih zbivanja. Predmet smo analiza dobronamjernih i zlonamjernih. Ne mogu nas ignorirati kao faktora u definiranju toga šta je identitet muslimana, Bošnjaka i šta je pozicija nas kao naroda uopće u društvenim odasima u BiH. Proces konsolidiranja, organiziranja i progresa IZBiH nije završen. Nadam se da će put koji smo mi trasirali biti nastavljen u korist svih muslimana, ali i svih sugrađana s kojima dijelimo sudbinu u BiH, na Balkanu i u Evropi", naveo je Cerić.

Jasni su mu razlozi zbog koji je bio stalna meta negativnih kampanja. Prema njemu, one su imale za cilj da zbune i uvrijede muslimane, ali, napominje, višegodišnje kampanje imale su suprotan efekt.

"Za one koji su htjeli da me vrijeđaju, želim reći da ne postoji ništa na svijetu što je mene moglo uvrijediti i da ne postoji ništa što je mene moglo zaustaviti na mom putu.

Tim osobama želim da kažem da se nikada neću smirit dok god hodam na ove dvije noge. Dok u meni ima duše, ja ću raditi posao kojeg volim, a to je širiti misiju islamske etike i morala i biti ponos i dika mom narodu koliko moj narod to htio da primijeti. U svakom slučaju ja sam uživao u svakoj minuti svog posla. Ja sam jako sretan i zadovoljan čovjek. Veoma sam ispunjen sa svim uspjesima koje smo postigli", odlučan je Cerić.

Analizirajući probleme muslimana u Evropi, Cerić je istakao da ne misli da će se oni ikada osloboditi islamofobije. Jer je ona prisutna na isti način kao i antisemitizam.

"Antisemitizam i islamofobija će dolaziti u valovima koji će se smanjivati i povećavati, ovisno o tome koliko muslimani i Jevreji u Evropi budu organizirani da stalno podsjećaju na sebe i one koji su skloni islamofobiji i antisemitizmu, da je suprotno ljudskim pravima i demokratiji. Zanimljivo je bilo nedavno slušati generalnog sekretara Evropske komisije (EK) koji je u Sarajevu kazao da terorizam nema vjerskog ili nacionalnog imena, pa se Andersa Behringa Breivika ne može kazati da je kršćanski terorista, iako on tvrdi da želi spasiti kršćanstvo od islama. Nažalost, izgleda da smo mi muslimani morali čekati Breivika, pa da se onda kaže da ne postoji islamski terorizam, kao što ne postoji ni kršćanski. Sa tim licemjerjem mi ćemo, očito, morati živjeti. Morat ćemo se naviknuti i iznova iznalaziti snagu da se suprotstavljamo tim kvalifikacijama koje imaju za cilj da stalno budemo na optuženičkoj klupi", tvrdi Cerić.

Zašto se optužuju muslimani

Nadalje, napominje da ne postoje muslimanske trupe u nekoj dalekoj stranoj zemlji, gdje uređuju odnose. Ali, postoje trupe u muslimanskim zemljama, koje su ih okupirale. Paradoks je u tome, tvrdi reis Cerić, da se upravo takvi muslimani optužuju da su uzrok nestabilnosti i nemira u svijetu. Pita se da li u budućnosti može biti novih slučajeva poput Breivikovog.

"Nije zahvalno biti u poziciji žrtve i sebe prikazivati kao žrtvu. Niko to ne želi biti. Muslimani nemaju razloga da se osjećaju manje vrijedim. Ipak, moramo primijetiti da antiislamska propaganda prisutna u internacionalnim medijima. Pokazivanje na muslimane kao uzrok nasilja i terorizma na svijetu, tendenciozno je i sve to ima svoj cilj. Taj antiislamizam, to antimuslimanstvo je zasnovano na tako površnim predrasudama da ljudi razumiju da je to naprosto jedna histerija, propaganda koja se širi kroz različite forume. Ona ulazi u te elitne i religijske i političke sredine", zaključio je reis Cerić.

Federalna televizija i Fatmir Alispahić

Reis Cerić je istakao svoje ogorčenje na rad javnih RTV servisa u BiH. Posebno Federalne televizije (FTV). Prema njemu, ona ima "antiislamski i antibošnjački plan".

"FTV je napravljena da ubije i ono malo dostojanstva kod Bošnjaka. FTV preuzima ulogu sudstva, pa navečer umjesto informacija imate presude. FTV želi stvoriti takvu atmosferu da se samim Bošnjacima počne gaditi na njih same", kazao je Cerić.

Osvrćući se na slučaj tuzlanskog intelektualca Fatmira Alispahića kojem je onemogućeno da doktorira na Filozofskom fakultetu u Sarajevu, Cerić kaže da u Sarajevu postoji savremena inkvizicija čiji je plan da se utvrdi koliko "Bošnjaci mogu podnijeti poniženja".

Pozitivni efekti "Arapskog proljeća"

Komentirajući rezultate "Arapskog proljeća", reis Cerić je kazao da se oni mogu smatrati pozitivnim.

"Ovo je proces. Treba imati na umu da je i Evropa prošla kroz 30 godina ratova. Imala je svoj Vestfalski mir potpisan iz 1648. godine gdje je Evropa shvatila da se mora ustanoviti princip samopoštovanja i međusobnog poštovanja, vjerske i političke tolerancije. I, eto, Evropa je došla gdje je došla s Evropskom unijom (EU).

Muslimani prolaze kroz jednu vrstu procesa gdje je sloboda osnovno mjerilo vrijednosti. Stanje u pojedinim dijelovi arapskog svijeta bilo je neodrživo. No, ništa nije gotovo dok se ne svrši. Mislim da će iz ovog muslimani izaći jači, da će naučiti mnogo i da će doći na stupanj poštovanja jednih prema druga. Muslimani jako vole jedni druge, ali se ne poštuju. Dok se recimo u EU narodi možda i ne vole, ali se međusobno poštuju. Onog trena kada se muslimani budu poštovali koliko se vole, oni će izaći na zelenu granu", ocijenio je reis Cerić.

Razgovarali: Faruk Vele//Ömer